



Conselho de Imprensa de Timor-Leste

Promove Liberdade Espresaun no Liberdade Imprensa

Relatóriu Rezultadu Monitorizasaun no Análize ba Produitu Jornalístiku Meiu Komunikasaun Sosiál sira ba Trimesterál Primeiru – Trimesterál Segundu 2024

A. Rézumu eze kutiva

Monitorizasaun no Análize ba produitu jornalístiku meiu komunikasaun sosiál sira nian ne'ebé mak Conselho de Imprensa CI) halo nu'udar parte ida husi CI nian kompeténsia tuir Lei Komunikasaun Sosiál Artigu 44. Monitorizasaun ne'e halo atu mantein supervizaun ba produitu jornalístika ida-ne'ebé garante no hametin independénsia editoriál meiu komunikasaun sosiál nian iha kontestu kobertura no publikasaun atu públiku bele asesu informasaun loloos no kredível. Monitorizasaun refere halo ba produitu jornalístiku no programa sira meiu komunikasaun sosiál nian iha períodu trimesterál primeiru – segundu iha 2024. Ida-ne'e halo ho itensaun atu haree no analiza notísia no programa sira ne'ebé la sujeta ba prinsípiu sira jornalizmu nian no Kódigu Étika Jornalístika no asegura katak jornalista no meiu komunikasaun sosiál sira kumpri ka la'o tuir regra sira ne'ebe hatuur ona iha Kódigu Étika Jornalístika no lei Komunikasaun Sosiál.

Prinsipalmente, monitorizasaun no análize ne'ebé CI halo ne'e ho forma rua. Primeiru mak monitorizasaun no análize diaria ka monitorizasaun no análize ne'ebé halo lorloron. Segundu mak monitorizasaun no análize bazeia ba keisar (complaint) husi públiku, individu'u no entidade ruma. Monitorizasaun no análize forma rua ne'e hotu-hotu uza formatu espesiál. Keisar ne'ebé públiku, individu'u ka entidade ruma halo bainhira haree no konsidera produitu jornalístiku ruma husi kanál mídia sira la-tuir faktu no sirkumtánsia loloos. Diskoberta (findings) monitorizasaun no análize ne'ebé hetan, ekipa monitorizasaun no análize nian apresenta ba Plenaria CI nian atu haree no tetu antes foti desizaun hodi notifika no fó hanoin ba jornalista sira bazeia faktu infrasaun ne'ebé sira komete.

Diskoberta monitorizasaun nian ne'e mós konsidera nu'udar *feedback* ida husi CI ba jornalista sira no redasaun meiu komunikasaun atu hadi'a sira nia produitu jornalístiku no programa sira tuir prinsípiu jornalizmu universál no Kódigu Étika Jornalístika ne'ebé eziste. Durante períodu monitorizasaun iha períodu trimesterál primeiru no segundu ne'e CI identifika meiu komunikasaun sosiál balu nafatin halo notísia la-tuir prinsípiu jornalizmu no Kódigu Étika Jornalístika, pur ezempu notísia balu nafatin halo julgamentu (trial by the press), jornalista hatama nia opiniaun rasik iha notísia laran, notísia laiha konfirmasaun ho parte sira ne'ebé sai sujetu ba notísia ne'ebé publika. Enkuantu, notísia balu fali la sensível jéneru, bias no estereotipu jéneru ([haree dados iha parte diskoberta](#)).

Iha kontestu aplikasaun sansaun relasiona ho infrasaun ne'ebé komete, CI mós konsege hasai notifikasaun ka nota informativa ba mídia lima iha priódu monitorizasaun no análize trimesterál primeiru no segundu nian ho kanál mídia diferente. Aleinde ida-ne'e, CI mós simu keisar husi públiku, purezempu hanesan keisar husi Komapaña Salimagu no Ministériu Saúde relasiona ho Jornál Independente ninia notísia investigativu kona-ba prosesu sosa

aimoruk no stockout aimoruk iha Hospital Nasionál Guido Valadares (HNGV) ([haree dados iha findings](#)). Bazeia ba keisar hirak ne'e mak ekipa CI halo análise ba konteúdu noítisia nian karik viola Kódigu Étika Jornlizmu ou lae hodi submete no apresenta ba plenaria molok foti desizaun kona-ba fó nofikasaun no nota informativa ba jornalista ne'ebé konsidera viola Kódigu Étika Jornlizmu nian.

B. Métopu monitorizasaun, análise no teknika halibur dados

Métodu Monitorizasaun ne'ebé uza iha mak:

- Le'e; ekipa monitorizasaun le'e no haree produktu jornalítika idaidak ne'ebé publika iha jornál no média online sira.
- Rona no haree; iha parte ne'e, ekipa monitorizasaun presizamente tenke rona no hareeprodu tu jornalístiku husi média eletróniku sira hanesan rádiu no televizaun atu hetan faktu sira ne'ebé iha.

Teknika halibur dados – koleasaun dados:

- Rekolla ka halibur jornál sira no screenshot notisi sira sira média online sira.
- Halo peskiza ba referénsia no dokumentu sira ne'ebé presiza.
- Halo gravasaun ba notisia no programa sira ne'ebé média eletrónika sira, rádiu no televizaun tranzmite.
- Iha prosesu monitorizasaun ne'e, ekipa CI uza *template* ka formatu espesial rua. Template ne'e ninia konteúdu mak buat tolu importante mak hanesan, konteúdu notisia, prinsipiu sira jornalístika nian, aspetu legal no valor notisia sira¹.
- Métodu ne'ebé uza iha análise rezultadu mak "Quantitative no Qualitative in-depth Analysis".
- Báze ka *acuan* análise nian. Ekipa CI uza Kódigu Étika Jornlizmu, Lei Komunikaun Sosiál, Matadalan Reportajen Violénsia Bazeia ba Jéneru, Matadalan Reportajen Jornlizmu Inkluzivu no Prinsipiu Universál Jornlizmu nian hodi halo análise ba produktu jornalístiku ka notisia ne'ebé kanál média sira pública.
- Ámbitu ka *Scope*. Montorizasaun no análise ba produktu jornalístiku kanál média sira limita iha notisia jornál, média eletrónika, hanesan rádiu no televizaun nomós média online. Kanál média sira ne'e mak, RTTL e.p., Ajénsia Notisioza Tatoli, GMN TV, Diário Nasionál, Timor Post, STL, Independente, Tve, Hatutan.com, Lafaeknews, Dili Post, Lolowari, Guardamor tv, Radio Liberdade, SapNews, no Media Mudansa.

C. Diskoberta (findings)

Rezultadu sira monitorizasaun no análise nian mak hanesan temi tuir mai:

- Rezultadu Kuantitativu

Gráfiku infrasaun sira ne'ebé kanál média sira komete hasoru kode Étika Jornliztika iha trimestre I no II fulan **Janeiru, FEVEREIRU, MARSU, ABRIL, MAIU, NO JUÑU 2024** mak tuir mai ne'e;

Nu.	Rezultadu Monitorizasaun Meiu no Orgaun ComSos	Kuantidade
1	Gardamor News	1
2	Jornal Timor Post	5

¹ Metodolojia monitorizasaun no análise média, In-depth analys no Specific template media monitoring

3	GMN TV	3
4	Tatoli.IP	1
5	Jornal Dili Post	1
6	Sapnews.tl	1
7	Hatutan.com	1
8	RTTLEP	4
9	Jornal Diário GMN	1
10	Jornal STL	3
11	Jornal Independente	3




Tabela no Gráfiu Orgaun no Meiu Ne'ebé, Kontra Kode Étika tuir pontu ida-idak mak hanesan tuir mai ne'e;

Nu.	Rezultadu Monitorizasaun Infrasaun Étika	Kuantidadee
1	Pontu 1	1
2	Pontu 2	3
3	Pontu 5 (Trial By The Press)	15
4	Pontu 6 (Cover both Sides)	8
5	Pontu 7	2




Tabela no Grafiku Infrasaun Étika Tuir Tipu Média

Nu	Infrasaun Étika Tuir Tipu Média	Kuantidade
1	ONLINE	7
2	ELETRÓNICA/TELEVIZAUN	5
3	IMPRIME	11




Tabela no Gráfiku Dadus Nota informativu ba jornalista ka kanál mília sira

Nú.	Mília	Totál
1	Jornal Timor Post	3
2	Jornal Independente	2
3	RTTLEP	1
4	GMN TV	3
5	Gardamor News	1




Tabela no Grafiku Keisar notísia mai CI

Nú.	Prejudikadu/Mília	Totál
1	Kompañia Sali-Magu keisar Jornál Independente	2
2	Ministériu Saúde keisar Jornál Independente	1
3	Ministeriu Edukasaun keisar Jornál STL	1




Tabela no Grafiku Dadus Notifikasaun ba Média

Nú.	Tipu sansaun	Média	Totál
1	Advertensia	Jornal Timor Post	1
2		Jornal	1

b. Rezultadu Kualitativu

Diskoberta ka rezultadu análize kuantitativu mak hanesan tuir mai ne'e:

***RTTL EP, 5 Janeiro 2023**

***Típu Notisia: Straight News**

Notisia RTTL EP, Edisaun 5 Janeiro 2024, ho título “PM Deskonfia Profisionál Saude Balun Foti Subar Medikamentu”. Tuir CI nia análise, notisia ne'e la hakerek di'ak tuir prinsipiu *cover both sides* tanba Redasaun RTTL E.P. la halo konfirmasaun ho parte profisionál saude ka médiku sira kona-ba Priméiru Ministru Xanana Gusmão nia akuzasaun hasoru sira. CI haree katak notisia nia título no lead ne'e akuzativu (trial by the press) tanba la hatudu faktu kona-ba fonte nia akuzasaun ne'ebé dehan “Profisionál Saude Balun Foti Subar Medikamentu Husi Fasilidade Saude Sira Estadu Nian.” Maske jornalista uza liafuan deskonfia, maibé bainhira laiha konfirmasaun ho ema ne'ebé akuzadu iha notisia refere, ida-ne'e nafatin konsidera nu'udar trial by the press. Lead notisia nian mak,” PM Kayrala Xanana Gusmão deklarara governu da-sia halo hela estudu hodi identifika problema ne'ebé akontese iha setór saude, xefe governu haktuir estudu ne'ebé governu halo atu evita médiku no enfermeiru ne'ebé serbisu iha fasilidade saude manan osan estadu la bele iha klinika privadu. Xanana deskonfia profisionál saude ne'ebé iha klinina privadu bele foti subar medikamentu husi fasilidade saude estadu nian.”

Enkuantu notísia nia sitasaun ka kutipan mak, “buat boot ida iha saúde nian maka ami halo hela estudu haree hela se ita boot médiu ida serbisu iha ospitál simu osan estadu nian labele iha klinika, tanba fó liu atensaun liu ba ita-boot nia klinika hasai ai-moruk ba hotu ita boot nia klinika ida ne’e tenke kurize, ho edukasaun ne’e profisaun la’ós servisu.” Ho sitasaun ida-ne’e, buat ne’ebé fonte hato’o iha sitasaun ne’e konsidera nu’udar verasidade parsiál (kebenaran sepihak) tanba Redasaun RTTL E.P. la konsege inklui resposta husi parte sira ne’ebé sai sujetu ba notísia ne’e liuhusi konfirmasaun atu hatene nia verasidade loloos. Asuntu politika liga kontestu Timor-Leste, saida deit mak Xanana ko’alia ne’e loos hotu no konsidera Xanana mak lia-loos. Tanba ne’e mak atu evita halo julgamentu ba ema ka parte ruma ou evita konkluzau sedu no sujetivu husi públiku, nesesariamente tenke halo konfirmasaun. Notísia nian link: <https://www.youtube.com/live/486DxLr-SUM?si=lqYLTKegX3S5IICL>.

Bazeia ba rezultadu análize iha leten, CI konsidera Redasaun RTTL E.P. viola Kódigu Étika Pontu 5 tanba halo julgamentu hasoru ema ka parte seluk sein faktu. Aleinde ida-ne’e, Redasaun RTTL E.P. mós viola Kódigu Étika Pontu 6 tanba halo notísia ne’ebé la balánsu no la halo konfirmasaun ho parte ne’ebé sai akuzadu iha notísia ne’e.

***RTTL EP, 22 Janeiro 2024**

***Típu programa: Entrevista**

Programa Sete Minutus RTTL EP, Edisaun 22 Janeiro 2024, ho título “Ministériu Edukasaun klarifika profesór kontratadu tinan 2023”. Tuir CI nia análize, programa ne’e la-tuir prinsípiu *cover both sides* tanba Redasaun RTTL E.P. la-apresenta profesór kontratadu sira ne’ebé sira nia kontratu termina iha Dezembru 2023. Maibé, apresenta deit fonte ida husi Ministériu Edukasaun hodi hato’o razaun sira tanba saida mak ministériu refere termina kontratu profesór sira. Fonte ne’e mak kordenadór gabinete apoiu jurídiu lasalde Rodrigues Pereira. Fakta deklarativa fonte nian iha sitasaun ka grab programa ne’e mak, “relasiona ho profesór kontratadu sira ne’ebé maka asina kontratu ho ministériu edukasaun, tuir sira nia termu kontratu ita halo análize ba durasaun kontratu sira asina iha mes de Abril maibé iha nia efeitu retroativu husi dia 1 Janeiro to’o 31 Dezembru 2023. Sira nia kontratu ne’e termina ka cesa automatimatikamente, la’ós Ministériu Edukasaun maka hapara, signifika kontratu la’o hela nufim ministeriu hapara ida ne’e maka ita bele hatete katak hapara kontratu”

CI haree katak narativa ka faktu deklarativa ne’ebé fonte refere hato’o ne’e nu’udar verasidade parsiál tanba Redasaun RTTL E.P. la-apresenta fonte husi profesor sira hato’o sira nia hanoin kona-ba deklarasaun ne’ebé representante Ministériu Edukasaun hato’o iha Program 7 Minutus Ne’e tanba asuntu ne’e sai polémiku ona iha sosiedade nia leet. Liga ho asuntu sira ne’ebé konsidera kontroversiál no sai preukupasaun ema barak nian presizamente tenke apresenta fonte rua atu hato’o presepetiva diferente husi asuntu ida. Bainhira programa ida-ne’e apresenta fonte ida deit mak públiku sei hetan deit lia-loos husi parte ida no sei hamosu konkluzau sujetivu husi haree-na’in sira. Entaun, RTTL E.P. nia programa ida-ne’e seidauk to’o iha buat ida bolu verasidade jurnalizmu ka kebenaran jurnalizmu. Programa 7 Minutus nia link: <https://www.youtube.com/live/H2ISw9bwQx0?si=ZWoUU3o2MyIzABSL>.

Ho ida-ne’e, CI konsidera RTTL E.P. viola Kódigu Étika Pontu 6 tanba la-apresenta fonte seluk iha ninia programa Sete Minutus hodi halo programa ne’e balánsu no justu.

***RTTL EP, 27 Janeiro 2024**

***Típu Notisia: Straight News**

Notisia RTTL EP, Edisaun 27 Janeiro 2024, ho título “Deskonfia Funsionariu Balun Iha Diresaun Servisu Notariadu Komete Iregularidade Hodi Halo Emisaun Pasaporte Ba Kliente Sira Lihusi Dalan Ilegal”. Tuir CI nia análise, notisia ne’e la hakerek di’ak tuir prinsípiu *cover both sides* tanba Redasaun RTTL E.P. la halo konfirmasaun ho parte notariádu liuliu diretór responsavel ka pesoál téknika sira ne’ebé toma-konta tratamentu pasaporte kona-ba informasaun akuzativu ne’ebé Ministru Justisa Interinu, Paulo Remeidos hato’o iha notisia ne’e. Link notisia ne’e maka;

https://www.youtube.com/live/VZGn0kMmGLs?si=k_BcrOBvxgL2FzOI.

CI haree katak notisia ne’e nia título no lead di’ak no la-akuzativu tanba uza liafuan deskonfia no la-halo akuzasaun direta. Notisia nia lead mak, “Ministru Justisa Interinu Paulo Remédios konfirma Ministériu Justisa simu ona informasaun kona-ba irregularidade emisaun pasaporte ne’ebé deskonfia husi funsionáriu balun, nia argumenta PSIK iha autoridade atu kaer funsionariu sira ne’ebé trata kliente sira-nia pasaporte liuhusi dalan ilegal”. Maske notisia ne’e ho liafuan deskonfia, maibé bainhira laiha konfirmasaun ho ema ne’ebé akuzadu iha notisia refere, ida-ne’e nafatin konsidera nu’udar *trial by the press* ka média halo julgamentu hasoru ema ka instituisaun ruma.

Enkuantu notisia nia sitasaun ka kutipan mak, “ita simu tiha ona informasaun ké iha prosesu irregularidade emisaun pasaporte, señor Primeiru Ministru mós fó ona orientasaun karik iha fallansu ha’u maka responsabiliza. Karik iha irregularidade PSIK iha autoridade atu kaer ema”. Deklarasaun ne’ebé fonte hato’o iha sitasaun ne’e konsidera nu’udar faktu deklarativa tuir informasaun ne’ebé nia hetan no ida-ne’e konsidera nu’udar veracidade parsial (kebenaran sepihak) tanba Redasaun RTTL E.P. la-konsege halo konfirmasaun atu hatene nia veracidade loloos. Konfirmasaun prezizamente tenke halo atu evita konkluzaan sedu no subjetivu no evita julgamentu husi públiku.

Bazeia ba rezultadu análise iha lete, CI konsidera Redasaun RTTL E.P. viola Kódigu Étika Pontu 5 tanba halo julgamentu hasoru ema ka parte seluk sein faktu. Aleinde ida-ne’e, Redasaun RTTL E.P. mós viola Kódigu Étika Pontu 6 tanba halo notisia ne’ebé la balánsu no la halo konfirmasaun ho parte ne’ebé sai akuzadu iha notisia ne’e.

***RTTL EP I Marsu 2024**

***Típu Notisia: Straight News**

Notisia RTTL EP, Edisaun I Marsu 2024, ho título “Komandu PNTL munisipiu Bobonaro identifika ona inan ba kazu soe bebe iha Maliana hodi submete ba prosesu investigasaun”. Tuir CI nia análise, notisia ne’e la hakerek di’ak tuir matadalan reportejen Violénsia Bazeia ba Jéneru (VBV) tanba notisia ne’e título no konteúdu (news body) bias no estereotipu jéneru. Título notisia no news body, la’ós deit bias jénder, maibé mós akuzativu (*trial by the press*) tanba akuza feto mak soe bebe no la-uza liafuan deskonfia. Iha parte seluk notisia nia lead di’ak tanba uza liafuan autór, nune’e la jeneraliza aktu krime soe bebe ne’e hodi refere ba feto. Maske nune’e, iha *ending* notisia nian, notisia ne’e enfatiza akuzasaun ne’e hodi dehan feto mak soe bebe, afinál sidauk iha rezultadu investigasaun ba kazu ida-ne’e. Ending notisia nia mak, “**bebe ne’ebé nia inan soe** halo ona autopsia no sei lori fali ba munisipiu Bobonaro hafoin finaliza autopsia. Entretantu, autoridade policial sei buka tuir autor mane ne’ebé la iha

responsabilidade ba kazu ne'e, maibé sei hein deklarasaun kompleta ba inan husi bebe ne'e. "Maske nune'e, polisia munisipiu Bobonaro asegura ona inan ba bebe hodi loke investigasaun."

Nune'e mós sitasaun ka kutipan notisia nian. Sitasaun notisia nian publika momos fonte nia lian ne'ebé dehan inan ne'ebé soe bebe. Sitasaun fonte nian mak, "prontu ami simu ona informasaun husi komandu Bobonaro, depois bebe ne'ebé mate isin ne'e lori ona mai HNGV halo autopsia depois orsida otopsia hotu sei lori fila ba Bobonaro, no komando identifika ona autór husi inan ne'ebé soe bebe, no agora halo hela identifikasaun iha komando Bobonaro. Maske fonte temi dehan inan ne'ebé soe bebe, maibé tuir étika jurnalizmu no matadalan VBG, jornalista iha obrigasaun hodi taka fonte nia voice ne'ebé akuzativu ne'e. Tanba iha lead notisia nian fonte hateten sira foin hahú foti deklarasaun husi suspeitu ka autór, signifika investigasaun kle'an ba kazu soe bebe sei iha prosesu hela no suspeitu seluk seidak identifika. Notisia nia link: <https://www.youtube.com/live/wbLakP30kt0?si=xofbcCLRMhIj9aHi>.

Ho faktu no análise iha leten, ekipa CI konsidera Redasaun RTTL E.P. viola Kódigu Étika 5 tanba halo julgamentu (trial by the Press) hasoru ema seluk, iha kazu ne'e halo akuzasaun hasoru feto. Aleinde ida-ne'e, notisia la-tuir prinsípiu sira ne'ebé hakerek iha Matadalan Reportejen VBJ ne'ebé fahe ona kanál mídia hotu-hotu.

***Tatoli, 21 Marsu 2024**

***Típu Notisia: Straight News**

Notisia Tatoli, Edisaun 21 Marsu 2024, ho título "PNTL Asegura Joven na'in 42 iha Portu Dili". Tuir CI nia análise, notisia ne'e hakerek di'ak tuir rekízitu notisia no elementu sira notisia nian. Maibé iha parte seluk notisia ne'e la tuir pinsípiu moralidade ka azas moralitas jurnalizmu nia ne'ebé hateten labele temi identidade vitima ka suspeitu ba krime ne'ebe envolve labarik ka joven. Iha notisia ne'e, Redasaun Tatoli tau momos imajen joven na'in 42 ne'e sein blur ka taka sira nia oin ka isin-lolon. CI mós haree katak foto imajen ne'e la respeita ka la tane prinsípiu prezunsaun inosente ka azas praduga tak bersalah ne'ebé haktuir mos iha prinsípiu supremasia lei ka azas supermasi hukum tanba halo notisa ne'e dirije públiku hodi halo konkluzau sujetivu no halo julgamentu hasoru joven sira ne'e. Notisia nia link: <https://tatoli.tl/2024/03/21/pntl-asegura-joven-40-iha-portu-dili/>.

Iha notisia ne'e Redasaun Tatoli la taka identidade hanesan imajen ema sira ne'ebé deskonfia envolve iha aktu krime ne'ebé tuir lolos sira seidak komete. Iha notisia ne'e mós RedasaunTatoli la taka identidade joven sira ne'ebé karik nia otas sei tama iha idade labarik nian Ho ida- ne'e, CI konsidera notisia ne'e viola Kódigu Étika Pontu 5 ne'ebé hateten Salvaguarda prezunsaun inosénsia arguidu iha prosesu tribunál nia laran to'o hetan desizaun finál hosi tribunál no respeita vitima krimi no nia familia sira nia identidade, ho kuidadu especial atu husik nu'udar anonimato ba vitima krimi seksual no labarik sira nebe sai arguidu."

***Timor Post Onlie, 6 Janeiro 2023**

***Típu Notisia: Straight News**

Notisia Timor Post Onlie, Edisaun 6 Janeiro 2023, ho título “Ajar: Salva Estado husi Bankarota, Xanana Labele Hato’o Promesa Falsu”. Tuir CI nia análise, notisia ne’e la hakerek di’ak tuir rekízitu notisia nian no prinsipiu jornalizmu objetividade tanba faktu sira ne’ebé ne’ebé hato’o iha notisia ne’e la refleto realidade loloos tuir sitasaun ka kutipan fonte nian. Pur ezemplu hanesan título notisia la han-malu ho faktu deklarativa iha sitasaun ne’ebé fonte hato’o. Nune’e mós lead notisia nian. Notisia nia lead la refleto faktu deklarativa fonte nian. Sitasaun fonte nian mak “tanba ne’e ha’u hakarak haree rezultadu, ha’u hakarak haree buat ne’ebé konkretu, labele promete de’it. Agora dadauk promete 120 dias ne’e, maun Xanana la kumpre tiha ona, agora mai promete foun fali, ne’ebé ha’u lakohi komentáriu, maibé ha’u dezeja de’it sira bele kumpri tanba ne’e atu salva ita-nia Estado husi bankarota, tanba estado dadauk la’o ne’e atu bankarota dadauk ona.”

Enkuantu lead notisia nian mak, “Deklarasaun remodelasaun husi Priméiru Ministro (PM) Kay Rala Xanana Gusmão, Diretór Ezekutivu Assosiasaun Justice And Right (AJAR) José Luis de Oliveira, dezeja, atu promesa remodelasaun ne’e bele sai realidade labele hela de’it ho promesa falsu no la kumpre nia promesa.” Ezemplu fraze promesa falsu iha título no lead notisia nian, ida-ne’e konsidera nu’udar jornalista ka editór nia opiniaun, la’ós mai husi deklarasaun fonte nian. Iha sitasaun, fonte hateten mak labele promete deit, la’ós promesa falsu. CI haree katak fraze promesa falsu nu’udar interpretasaun subjetivu jornalista nian. Link notisia: <https://timorpost.com/politika/tp-46478/ajar-salva-estado-husi-bankarota-xanana-labele-hatoo-promesa-falsu/>.

Ho ida- ne’e, CI konsidera Notisia ne’e viola Kódigu Étika Pontu 2 tanba jornalista la hato’o faktu ho loloos no la distingui entre faktu no notisia.

***Timor Post Online, 10 Janeiro 2023**

***Típu Notisia: Straight News**

Notisia Timor Post Onlie, Edisaun 10 Janeiro 2023, ho título “Deskonfia Tráballadór ilegal Balun Komete Prostituisaun Iha Ema-Nia Rai”. Tuir CI nia análise, notisia ne’e la hakerek di’ak tuir rekízitu no elementu notisia nian tanba la-apresenta faktu loloos no dadus kona-ba atividade prostituisaun ne’ebé desconfia Timor oan balu mós envolve. Pratikamente, iha elementu báze importante tolu iha notisia laran, priméiru mak faktu, rezultadu entrevista no dadus. Maibé, iha notisia ne’e rasik elementu notisia rua mak la-mosu iha notisia ne’e, pur ezemplu hanesan faktu no dadus no iha deit mak rezultadu entrevista. Iha notisia ne’e mensiona katak Timor oan balu envolve iha atividade prostituisaun no halai sees ona husi sistema no servisu ilegalmente iha Australia no Korea, se nune’e Timor oan na’in hira mak envolve iha prostituisaun ne’e? no hira mak sees husi sistema? Maibé, faktu no dadus kona-ba ida-ne’e la-mosu iha notisia ne’e.

Notísia nia lead mak, “Timor oan barak mak liu husi programa Governu nian ba serbisu iha Australia no Korea inklui nasaun seluk dadauk ne’e la tama ona sistema ka sai traballador ilegál iha ema-nia rai, inklui komete iha vida prostituisaun ka serbisu sex komersiál no la-fila tanba Timor-Leste menus kampu traballu. CI haree katak narativa sira iha notísia nia título no lead ne’e nu’udar faktu deklrativa husi fonte no la-bazia ba faktu. Se dehan Timor oan envolve iha atividade prostituisaun, nia evidénsia saida no Timor ona hira mak envolve? CI haree katak notísia ne’e mós la-balánsu no la-proporsionál tanba Redasaun Timor Post la-halo konfirmasaun ho parte sira relevante hanesan SEFOPE, Embaisada Timor-Leste iha Australia no Timor oan sira ne’ebé dadauk ne’e iha serbisu iha Australia no Korea ou karik balu fila ona mai Timor atu hatene ninia veracidade loloos. Aleinde ida-ne’e, notísia ne’e mós konsidera hanesan *trial by the press* tanba halo akuzasaun falsa hasoru ema ka instituisaun seluk la-bazeia ba faktu.

Sitasaun ka kutipan fonte nian mak, “Ita-nia maluk timoroan ne’ebé ita deskonfia komete iha servisu ilegál iha ema-nia nasaun balu deskonfia komete iha prostituisaun iha estranjeiru, ne’e ita la-bele fó sala ba sira, tanba kondisaun mak obriga, ita-nia governu la kria kampu traballu iha rai laran”. Maske iha situasaun ne’e fonte uza liafuan deskonfia no Redasaun Timor Post rasik uza liafuan deskonfia, maibé bainhira laiha faktu, dadus no konfirmasaun ho parte sira relevante, notísia ida-ne’e konsidera *fake*. Enkuantu, iha ending (background) notísia nian, jornalista tau fali informasaun ne’ebé laiha ligasaun ho notísia ida-ne’e. Background notísia ne’e mak, “horseik (9/1) mos servisu imigrasaun Timor-Leste kansela viajen Timor oan na’in 6 ne’ebé deskonfia vitima tráfico umanu tanba hetan rekrutamentu husi kampaña Multi Game husi Brasil atu ba serbisu iha jogu kasino iha Cambdia.” <https://timorpost.com/internasional/tp-46635/deskonfia-traballador-ilegal-balun-komete-prostituisaun-ih-ema-nia-rai/>.

Ho ida- ne’e, CI konsidera notísia ne’e viola Kódigu Étika Pontu 1 tanba la-hato’o faktu no lia-loos. Aleinde ida-ne’e, notísia ne’e mós viola Kódigu Étika Pontu 6 tanba Redasaun Timor Post la-halo konfirmasaun ho parte sira relevante no sai sujetu ba notísia ne’e.

***Timor Post, 29 Janeiru 2024**

***Típu Notisia: Straight News**

Notisia Timor Post, Edisaun 29 Janeiru 2023, ho título “Deskonfia Funsionáriu Notariadu Balun Sai Broker”. Tuir CI nia análise, notísia ne’e la hakerek di’ak tuir prinsipiu jurnalizmu *cover both sides* tanba redasaun Timor Post la-halo konfirmasaun ho funsionáriu ka diretór responsavel sira iha Notariadu kona-ba informasaun akuzativu ne’ebé Ministru Interinu, Paulo Remeidos hato’o. Aleinde ida-ne’e, notísia ne’e mós la-distingi entre faktu ho opiniaun tanba jornalista ka editór mós hatama ninia opiniaun iha notísia laran. Jornalista ka editór nia opiniaun mosu kedas iha notísia nia título. Título notísia ne’e konsidera nu’udar jornalista nia opiniaun ka konkluzoan sujetivu jornalista nian tanba sees husi fakta deklarativa sira fonte nian iha sitasaun ka kutipan no narativa iha lead notísia nian.

Sitasaun notísia nian mak, “Ha’u simu imformasaun katak, pasaporte rihun 16 ne’ebé mak mai iha faze dauluk hotu lalais, tanba funsionáriu iha Notariadu mak fasilita ema no maski ema halo ona pagamentu maibé la simu pasaporte tuir prazu, ne’ebé inklui iha mós sira seluk .Ita simu imformasaun katak mosu irregularidade iha prosesu emisaun ba pasaporte deskonfia ema iha Notariadu mak hamosu irregularidade.” Fonte nia sitasaun ida-ne’e, laiha liafuan ka fraze Deskonfia Funsionáriu Notariadu Balun Sai Broker. Entaun, fraze ne’e puramente konkluzau ka interpretasaun sujetivu jornalista ka editór nian. Ci mós haree katak título notísia ne’e mos akuzativu (trial by the press) tanba Redasaun Timor Post la-halo konfirmasaun ho parte sira ne’ebé sai akuzadu iha notísia ne’e maske título ne’e rasik uza liafuan deskonfia. Afinál iha sitasaun ne’e fonte hateten deit mak liafuan ka fraze mosu iregulariade, la’ós sai broker. Konfirmasaun preziamnte tenke halo atu evita konkluzau sedu no konkluzau sujetivu husi públiku nomós atu evita julgamentu husi públiku.

Ho ida- ne’e, Ci konsidera notísia ne’e viola Kódigu Étika Pontu 2 tanba la-hato’o faktu ho loloos no la-distingi entre notísia no opiniaun. Aleinde ida-ne’e, notísia ne’e mós viola Kódigu Étika Pontu 6 tanba Redasaun Timor Post la-halo konfrimasaun ho parte sira relevante no sai sujetu ba notísia ne’e. Notísia ne’e mós viola Kódigu Étika Pontu 5 tanba halo julgamentu hasoru ema ka instituisaun ruma sein faktu.

***Timor Post, 3 Abril 2024**

***Típu Notisia: Straight News**

Notisia Timor Post, Edisaun 3 Abril 2024, ho título “**Kazu Likisá, Autoridade Apresenta Na’ok-teen Iha Tribunal**”. Tuir Ci nia análise, notísia ne’e nia título akuzativu ka halo trial by the press tanba direktamente akuza ema hodi dehan *naok-teen*. Tuir lolos Redasaun Timor Post uza liafuan deskonfia ou suspeitu iha ninia fraze iha título notísia nian atu evita halo akuzasaun direita hasoru ema seluk, maibé ida-ne’e akontese. Maske nune’e, notísia ne’e-nia lead hakerek ho di’ak tanba uza naran inisiál hodi taka suspeitu sira-nia identidade. Lead notísia nian mak “Iha alegasaun primeiru interogatóriu ne’e, Ministériu Públiku liuhusi Procurador Ricardo Leite husu ba tribunal atu aplika medida Koasaun Prizaun Preventiva (PP) ba arguidu na’in-3 ho naran inisiál MMH, ET no AM, tanba envolve iha krime Roubu, ne’ebé deskonfia uza kareta luxu hodi ba na’ok sasan ho osan iha loja LEADSO, Munisipiu Liquica.”

Nune’e mos sitasaun ka kutipan fonte nian iha notísia ne’e di’ak tuir duni rekízitu notísia nian. Sitasaun notísia nian mak, “prosesu interogatóriu ne’e seidauk iha desizaun, maibé iha alegasaun Ministériu Públiku nian ne’e husu ba tribunál atu aplika medida koasaun prizaun preventiva ba aruidu na’in-3 tanba deskonfia iha duni indisíu katak arguidu sira komete iha krime robu. Maibé, ha’u hanesan parte defeza iha ha’u nia alegasaun husu ba tribunál atu aplika medida koasaun apresentasaun periódika ba ha’u nia kliente sira.” Sitasaun ne’e di’ak tuir duni prinsípiu jornlizmu no Kódigu Étika tanba uza liafuan deskonfia hodi refere ba aktu ne’ebé arguidu ka suspeitu sira komete tanba sei iha prosesu julgamentu no seidauk iha desizaun finál huis tribunál.

Ho ida- ne'e, CI konsidera notisia ne'e viola Kódigu Étika Pontu 5 tanba halo akuzasaun ka trial by the press hasoru ema seluk sein konsidera prinsípiu prezunsaun inosénsia nu'udar haktuir iha Kódigu Étika Pontu 5 ne'e.

***Timor Post, 13 Maiu 2024**

***Típu Notisia: Straight News**

Notisia Timor Post ho ninia fotografia, Edisaun 13 Maiu 2024, ho título "**Feen-Oan Husu Estadu RDTL Salva La'en-nia Vida**". Tuir CI nia análize, notisia ne'e hakerek ho di'ak tuir rekízitu no elementu notisia nian tanba apresenta faktu loloos kona-ba asuntu ne'ebé sai anglu notisia nian. Título no news Body ne'ebé inklui sitasaun no atribuisaun fonte di'ak hotu. Lead notisia nian mak "Candice Teves ho oan sira husi Fujitivu arnolfo Teves Jr husu atu estadu RDTL aseita ho pedidu azilu politiku nune'e bele salva ni atu moris." Enkuantu, notisia nia sitasaun mak "Tanba ne'e ha'u husu ba novel da pas na'in-2, fó aprovasaun azilu politiku, atu salva ha'u-nia laen nia moris. Ha'u husu umanidade tanba iha Timor-Leste iha duni justisa, ha'u nuudar inan no feen, bainhira hanoin Timor-Leste haruka nia fila ba rai Filipina ha'u fiar katak sei akontese ema oho nia".

CI haree katak lead no sitasaun notisia nian tuir duni rekízitu notisia nian, maibé buat ne'ebé sai kestaun mak étika liga ho notisia ne'e nia fotografia. Imajen ka fotografia ne'ebé Timor Post publika tau momos identidade labarik kiik ka menoridade ne'ebé nu'udar oan husi fujitivu Arnolfo Teves Jr. Étikamente Redasaun Timor Post iha obrigasaun étika hodi taka ka halo blur labarik sira ne'e nia imajen hodi labele sai konsumu públiku tanba sira inosente. Fotgrafia ne'e ho *caption* "familiares husi Fujitivu Arnolfo Teves JR ho Parte Defeza halo'o Konferénsia Imprensa iha Timor Lodge."

Ho ida- ne'e, CI konsidera notisia ne'e viola Kódigu Étika Pontu 5 la-taka identidade fujitivu Arnolfo Teves Jr nia oan sira nia identidade.

***Hatutan.com, 22 Janeiru 2024**

***Típu Notisia: Straight News**

Notisia Hatutan.com, Edisaun 22 Janeiru 2024, ho título "Tripulante Ró Berlin Ramelau ho Nakroma Fa'an mós Tiketi ho Folin US\$ 50 Kada Vaijen." Tuir CI nia análize, notisia ne'e la hakerek di'ak tuir rekízitu no elementu notisia nian tanba la-apresenta faktu loloos no dados kona-ba tripulante Ró Berlin no Nakroma ne'ebé fa'an tiketi ho folin US \$ kada viajen. Pratikamente, iha elementu baze importante tolu iha notisia laran, priméiru mak faktu, rezultadu entrevista no dados. Maibé, iha notisia ne'e rasik elementu notisia rua mak la-mosu iha notisia ne'e, pur ezemplu hanesan faktu no dados no iha deit mak faktu deklarativa husi Deputadu Maria Teresa Gusmão nu'udar fonte iha notisia ne'e. Se tripulante sira fa'an duni bilete ró nia ho folin karun, pelumenus iha vitima, liuliu pasanjeiru sira ne'ebé sosa bilete, entaun notisia ne'e tenke apresenta faktu ida-ne'e ho evidénsia konkretu, ezemplu hanesan

tikete ho folin \$ 50 no ema na'in hira mak sai vitima. Aleinde ida-ne'e, notícia ne'e nia título no lead mós akuzativu (trial by the press) tanba la-uza liafuan deskonfia, maibé diretamente hateten katak tripulante Ró Berlin no Nakroma fa'an tikete ho folin US \$ kada viajen ka komete iregularidade. Notícia nia

link: <https://www.hatutan.com/2024/01/22/tripulante-ro-berlin-ramelau-ho-nakroma-faan-mos-tikete-ho-folin-us-50-kada-viajen/>.

Notícia nia lead mak “Membro Parlamentu Nasionál hosi Bancada PD, Maria Teresa Gusmão, identifika iregularidade iha operasaun Ró Berlin Ramelau ho Nakroma tanba durante ne'e tripulante sira iha ró refere fa'an mós tikete bá pasajeiro sira ho folim \$ 50 kada viajen. Enkuantu sitasaun ka kutipan fonte nian mak, “Iregularidade ruma ne'ebé akontese iha Ró Berlin Nakroma no Berlin Ramelau tuir informasaun ne'ebé ami asesu katak tripolante Ró Berlin Nakroma no Berlin Ramelau halo atividade negosiu fa'an tikete bá pasajeiru maske ró sira hanesan propiedade estado nian. CI haree katak fraze ka narrativa sira iha notícia ne'e nia lead tuir duni deklarasaun ne'ebé fonte hato'o iha sitasaun nian, maibé la-apresenta faktu no dadus kona-ba saida mak fonte bolu iregularidade. Se fonte dehan nia identifika iregularidade iha operasaun ró rua nian, entaun nia tenke apresenta faktu, la'ós rumor.

Notícia ne'e mós la-balánsu tanba Redasaun Hatutan.com la-halo konfirmasaun ho parte Aportil ou tripulante sira ne'ebé nu'udar akuzadu iha notícia ne'e atu hatene nia veracidade. Fonte informasaun ne'ebé deputada hetan mós la-klaru tanba nia temi deit tuir informasaun ne'ebé nia hetan. Signifika laiha fonte konkretu, entaun informasaun ne'ebé nia deklara iha uma Fukun Parlamentu Nasionál ne'e konsidera nu'udar fake no konsidera hanesan veracidade parsial ka kebenaran sepihak.

Ho ida- ne'e, CI konsidera notícia ne'e viola Kódigu Étika Pontu 1 tanba la-hato'o faktu no lia-loos. Notícia ne'e mós viola Kódigu Étika Pontu 5 tanba halo julgamentu (trial by the press) hasoru ema ka entidade ruma sein faktu. Aleinde ida-ne'e, notícia ne'e mós viola Kódigu Étika Pontu 6 tanba Redasaun Hatutan.com la-halo konfrimasaun ho parte sira relevante no sai sujeitu ba notícia ne'e.

***GMN TV, 1 Marsu 2024**

***Típu Notisia: Straight News**

Notisia GMN TV, Edisaun 1 Marsu 2024, ho título “Kazu Soe Bebe Iha Mota Holsa Maliana PNTL Sei Identifika Tan Autor Mane”. Tuir CI nia análise, notícia ne'e nia título di'ak tuir matadalan reportejen Violénsia Bazeia ba Jéneru (VBV), maibé notícia nia lead mak bias gender no akuzativu tanba julga fetu nu'udar autór ba kazu soe bebe iha Holsa, Maliana. Fraze ka narrativa lead notícia nian mak, “foin lalais ne'e akontese kazu soe bebe iha mota laran, iha area Holsa Maliana daudaun ne'e komando PNTL munisipiu Bobonaro detein ona autor fetu nu'udar inan ba bebe ne'e iha sela komando PNTL Bobonaro, no hein identifika tan autor mane ne'ebé la iha responsabilidade ba kazu refere.” Lead notícia ne'e akuzativu tanba la-uza liafuan deskonfia, maibé diretamente dehan autór fetu, maske iha mós fraze ida mak dehan sei identifika autór mane, maibé bainhira uza nafatin liafuan fetu hodi refere ba fetu ne'e konsidera bias gender no la-tane prinsipiu prezunsaun inosénsia.

Iha parte news body nian, jornalista enfatiza tan fraze akuzativu no bias gender iha notisia ne'e. Narativa iha news body ne'e mak, "Komando PNTL munisipiu Bobonaro sei liuhusi servisu sekreta iha kinta horseik asegura ona autór feto ho inisial LDDM iha sela komando Bobonaro hodi kumpri oras 72 molok apresenta ba Tribunál hodi halo primeiru interrogatoriu". Nune'e mós sitasaun ka kutipan fonte nian, sitasaun notisia nian ne'e mós bias gender no akuzativu tanba fonte dehan inan ne'ebé mak soe bebe. Maske fraze ne'e mai husi deklarasaun fonte, maibé média mak tenke sensivel hodi taka liafuan sira akuzativu ne'e atu evita buat ida trial ba the press ne'e no konkluzau husi públiku. Notisia nia link mak: <https://www.youtube.com/live/me8ajaaNQfE?si=Vy74dPK3MkmHcGnh>.

Ho faktu no análise iha leten, ekipa CI konsidera Redasaun GMN TV viola Kódigu Étika 5 tanba halo julgamentu (trial by the Press) hasoru ema seluk, iha kazu ne'e halo akuzasaun hasoru feto. Aleinde ida-ne'e, notisia la-tuir prinsípiu sira ne'ebé hakerek iha Matadalan Reportejen VBJ ne'ebé fahe ona kanál média hotu-hotu.

***GMN TV, 8 Abril 2024**

***Típu Notisia: Straight News**

GMN TV , Edisaun 8 Abril 2024, ho título "Prezidente RAEOA Deklara Pilotu No Enjeneiru Husi Canada Tenta Atu Privatiza Aviaun ZEEMS." Tuir CI nia análise, notisia ne'e la hakerek di'ak tuir prinsípiu jurnalizmu *cover both sides* no prezunsaun inosénsia tanba Redasaun GMN TV la-halo konfirmasaun ho parte autoridade RAEOA anteriór, iha kazu ne'e mak eis Presidente Autoridade RAEOA, Arsenio Paixão Bano no pilotu sira Aviaun ZEEMS-nian atu fó sira ninia resposta ba Presidente Autoridade RAEOA, Rogerio Tiago Lobato ninia deklarasaun ne'ebé dehan, "Pilotu Aviaun ZEEMS Tenta Privatiza Aviaun ZEEMS. Notisia-nia link: <https://www.youtube.com/live/0O1OhX9FOJM?si=LRyq66xVA6lwcDAB>.

Notisia ne'e ninia título, lead no nia *news body* la-tane aas prinsípiu prezusaun inosénsia tanba kontein ho deklarasaun akuzativu sein uza liafuan deskonfia atu evita halo julgamentu (trial by the press) hasoru ema ka instituisaun ruma. Notisia nia lead mak, "Prezidente RAEOA Rogerio Tiago Lobato segunda ne'e hala'o enkontru ho Primeiru Ministru Xanana Gusmão hodi apresenta relatóriu serbisu durante fulan rua. Iha sorumutu presidente RAEOA ne'e mós hato'o ba xefe governu kona-ba problema aviaun ZEEMS ne'ebé daudaun ne'e pilotu no enjeneiru husi Canada tenta atu privatiza aviaun refere tanba halakon numeru rejistu aviaun nian." Enkuantu, notisia ne'e nia sitasaun ka kutipan mak, "horseik akontese kazu aviaun nian, ema sira ne'ebé husi Canada pilotu no enjeneiru sira ba apaga tiha numeru rejistu iha aviaun nia lolon, ne'e buat ida ke sira labele halo, tanba aviaun ne'e patrimoniun Estadu Timor-Leste nian, asaun ida ne'ebé sira halo ne'e ilegal konsidera krime tanba sira halo buat ida ke laloos. Hau konta mos ba señor PM kona-ba despeza boot ne'ebé kada fulan tenke selu para ema ida husi Canada atu kaer aviaun ida ke ita nian."

CI haree katak notisia ne'e ho natureza informativu (straight news), entaun la-konsege apresenta faktu sira hanesan dokumentu ruma ne'ebé iha ligasaun ho Sr. Rogerio Lobato ninia deklarasaun akuzativu ne'e. Entaun, faktu ne'ebé iha mak deklarasaun deit husi Presidente RAEOA, maibé la'ós faktu materiál ruma hanesan dokumentu ne'ebé

iha ligasaun ho aviaun ne'e ninia operasaun iha RAEAO no Dili. Redasaun GMN TV halo duni konfirmasaun, maibe la-tuir dalan pratika jurnalizmu nian tanba konfirmasaun ne'e halo fali ho Deputadu Fretilin, Antonio Moniz Clau, maibe la'os ho eis-presidente RAEAO, Arsenio Bano no pilotu sira aviaun ZEESM nian. Notisia ne'e mos la-apresenta faktu kona-ba Sr. Rogerio Lobato ninia deklarasaun ne'ebe dehan pilotu sira apaga numeru aviaun nian. Nune'e, laiha faktu kona-ba pilotu no enjineiru apaga numeru aviaun ZEESM. Maibe, GMN TV foka deit mak aviaun ZEESM semo no tuun iha Aeroportu Rota Do Sandalo, Oecusse.

Ho ida- ne'e, CI konsidera notisia ne'e viola Kodigu Etika Pontu 1 tanba la-hato'o kona-ba lia-loos ka veracidade kona-ba asuntu ne'ebe publika. Notisia ne'e mos viola Kodigu Etika Pontu 5 tanba halo julgamentu (trial by the press) hasoru ema ka entidade ruma sein faktu. Aleidende viola Kodigu Pontu 2 no 5, Redasaun GMN TV mos viola Kodigu Etika Pontu 6 tanba la-halo konfirmasaun ho parte sira ne'ebe sai akuzadu iha notisia ne'e.

***GMN TV, 17 Juñu 2024**

***Típu Notisia: Straight News**

GMN TV , Edisaun 17 Juñu 2024, ho titulu "Komunidade Muslumanu iha Timor-Leste sente Laran Haksolok Selebra Loron Idul Adha ba Dala rihun ida atus haat (1445) Hizria iha Meskita An-Nur Dili". Tuir CI nia analize, notisia ne'e ninia konteudu tomak hakerek ho di'ak tuir rekizitu no padraun produ tu jornalístiku nian. Ida-ne'e bele haree husi notisia ne'e titulu, *lead*, *news body* (sitasun ka kutipan) no ending notisia-nian hanesan background no news context. Lead notisia nian mak "tinan tinan nasaun hotu iha mundu inklui mos Timor-Leste selebra loron Idul Adha hanesan loron importante no loron boot daruak iha relijiaun Islam, loron Idul Adha selebra hafoin liu tiha loron 70 Idul Fitri nian nu'udar loron boot dahuluk. CI haree katak notisia ne'e nia lead hakerek ho di'ak tuir estrutura fraze lingua nian no la-violata prinsipiu jurnalizmu no Kodigu Etika Jurnalizmu ne'ebe iha. Notisia nia link: https://www.youtube.com/live/52V8BGZGIBk?si=rzV9u74_rRTqSMQ5.

Nune'e mos sitasun ka kutipan notisia nian. Notisia nia kutipan mak, "sentidu husi Idul Adha ne'e katak parte ida husi ami nia kultura ne'ebe eziste iha livru sagradu Al Quran liuhusi istoria ami nia profeta Ibrahim Ali Salaam ne'ebe hatudu nia orasaun, boa fe no adorasun ba Na'i Maromak hodi sakrifika nia oan mane Ismail, depois ida ne'e anju liuhusi nia uahiu ida ne'e sakfrika fali liuhusi domba/bibi." Maske nune'e, buat ne'ebe sai kestaun iha kontestu etika jurnalizmu mak imajen ka vidiu notisia nian tanba foka momos prosesu oinsa ema ko'a karau waka ninia kakorok hodi fahe ba kbit laek sira. CI haree katak vidiu iha notisia ne'e hatudu hahalok sadizmu ne'ebe Kodigu Etika Jurnalizmu rasik bandu, maibe de faktu Redasaun GMN deside hodi publika ([haree imajen iha aneksu](#)). Ho ida-ne'e, CI konsidera, Redasaun GMN viola Kodigu Etika Pontu 10 ne'ebe hateten evita *publika liafuan*, *imajen*, *lian ne'ebe tranzmite sadizmu ka violensia hasoru ema ka balada ne'ebe iha natureza hakanek publiku nia sentimentu*.

***Diário Nacional, 23 Janeiro 2024**

***Típu Notisia: Straight News**

Notisia Diário Nacional , Edisaun 23 Janeiro 2024, ho títulu“PN: Tripulante Berlin Ramelau-Nakroma Halo Negósiu Iha Ró Laran.” Tuir CI nia análise, notisia ne’e la hakerek di’ak tuir rekízitu no elementu notisia nian tanba la-apresenta faktu loloos no dados kona-ba tripulante Ró Berlin no Nakroma ne’ebé fa’an tiketi ho folin US \$ 50 kada viajen. Pratikamente, iha elementu bázé importante tolu iha notisia laran, priméiru mak faktu, rezultadu entrevista no dados. Maibé, iha notisia ne’e rasik elementu notisia rua mak la-mosu iha notisia ne’e, pur ezemplu hanesan faktu no dados, entaun iha deit mak faktu deklarativa husi Deputadu Maria Teresa Gusmão nu’udar fonte iha notisia ne’e. Se tripulante sira fa’an duni bilete ró nia ho folin karun, pelumenu iha vitima, liuliu pasanjeiru sira ne’ebé sosa bilete, entaun notisia ne’e tenke apresenta faktu ho evidénsia konkretu, ezemplu hanesan tikete ho folin \$ 50 no ema na’in hira mak sai vitima. Aleinde ida-ne’e, notisia ne’e nia títulu mós akuzativu (trial by the press) tanba la-uza liafuan deskonfia, maibé direktamente hateten katak tripulante Berlin – Nakroma halo negosiu iha ró laran. Liafuan deskonfia mosu deit mak iha notisia nia lead. Notisia nia lead mak, “Iha plenária Parlamentu Nasionál, segunda (22/01), Deputada Teresa Gusmão levanta kona-bá deskonfia tripulante iha ró berlin Ramelau no Nakroma, fó aluga kuartu ba pasajeiro Dili Atauro no Oe-Kusse ho folin dollar 50 kada viajen.”

Enkuantu sitasaun ka kutipan notisia nian mak,“ Tuir informasaun ne’ebé ami asesu husi Asosiasaun Marineiru Timor-Leste katak, sira (AMTL) identifika tripulante sira husi ró Berlin Nakroma Ramelau, halo negosiu fó aluga kuartu ba pasajeiru ho folin dollar 50 kada viajen, maske ró sira ne’e hanesan propiedade Etsadu nian”. CI haree katak fraze ka narrativa sira iha notisia ne’e nia sitasaun nu’udar fakta deklarativa, maibé la’ós faktu no dados kona-ba saida mak fonte bolu iregularidade.Se fonte dehan nia identifika iregularidade husi operasaun ró rua ne’e no informasaun ne’e nia hetan husi AMTL, entaun nia tenke apresenta faktu.

Notisia ne’e mós la-balánsu tanba Redasaun Diário Nacional la-halo konfirmasaun ho parte Aportil no tripulante sira ne’ebé nu’udar akuzadu iha notisia ne’e atu hatene nia veracidade. Informasaun ne’ebé deputada hetan ne’e mai husi AMTL, maibé la’ó faktu, dehan deit tuir informasaun ne’ebé ami hetan husi AMTL. Signifika informasaun ne’ebé nia hetan la-bazeia ba faktu, entaun informasaun ne’ebé nia deklarara iha uma Fukun Parlamentu Nasionál ne’e konsidera nu’udar fake no konsidera hanesan veracidade parsial ka kebenaran sepihak.

Ho ida- ne’e, CI konsidera notisia ne’e viola Kódigu Étika Pontu 1 tanba la-hato’o faktu no lia-loos. Notisia ne’e mós viola Kódigu Étika Pontu 5 tanba halo julgamentu (trial by the press) hasoru ema ka entidade ruma sein faktu. Aleinde ida-ne’e, notisia ne’e mós viola Kódigu Étika Pontu 6 tanba Redasaun Diário Nacional la-halo konfrimasaun ho parte sira relevante no sai sujetu ba notisia ne’e.

***Guardamor, 8 Marsu 2024**

***Típu Notisia: Vox POP**

Vox Pop Guardamor TV, Edisaun 8 Marsu 2024, ho título “Dignidade Feto Aas, Feto Labele Sai Lanu Ten”. Tuir CI nia análise, notícia ne’e notícia ne’e título sensasionál no *bias gender* tanba uza fraze feto labele sai lanu ten. Signifika fraze dignidade feto aas ne’e nu’udar espresaun pozitivu, maibe iha mós parte negativu tanba enfatiza bandu (larangan) ba feto labele hemu tua no labele lanu. Iha realidade moris sosiedade Timor nian, feto – mane bele hemu, pur ezemplu iha atividade serimoniál ruma feto-mane hemu kualker típu tua ka bebidas no ida-ne’e akontese iha fatin barak. Aliende ida-ne’e, notícia ne’e mós enfatiza iha liafuan adjetivu (kata sifat) lanu-ten. Liafuan ida-ne’e refere mós ba mitu ka mitos iha bahasa Indonesia katak feto labele lanu no mane deit mak bele lanu. Afinál iha realidade sé deit tantu mane ka feto bainhira hemu tua barak, klaru nia sei lanu. Entaun, liafuan lanu ten ne’e iha kontestu Timor nia konotasaun ladi’ak bainhira liafuan ne’e refere ba ema ruma tanba sei hamosu interpretaun oioin no sujetivu husi públiku, satan sosiedade Timor ne’ebé ninia sistema patriarkia sei forte tebes.

CI mós haree katak notícia ne’e ho típu vox pop, entaun difisil atu fonte sira hato’o sira nia prespetiva ka hanoin ne’ebé sensível no pozitivu ba asuntu jéneru. Guardamor nia vox pop ne’e halo iha âmbito komemorasauñ Loron Inteternasionál feto ne’ebé monu iha 8 Marsu 2024. Maske, fonte sira iha sira ninia kometáriu la sensível ba asuntu jéneru nian, maibé jornalista no mídia mak tenke sensível iha sira nia reportajen tuir matadalan VBJ no Kódigu Étika ne’ebé iha. Fraze seluk ne’ebé la sensível no *bias gender* iha konteúdu vox pop ne’e mak, “Parabens ba loron nasional feto, parabens ba feto timor hotu ohin loron importante tebe-tebes ba feto Timor hotu, atu kontente tanba hetan oportunidade tanba iha direitu hanesan ho mane seluk. Maibé ha’u husu atu labele uza direitu hodi kontra fali dever tomak ne’ebé iha.”

“Ha’u atu dehan katak, tuir istória, feto Timor uluk ne’e moris iha situaun la di’ak nia laran maibé iha dignidade. Ha’u dehan iha dignidade tanba feto uluk ne’e lamete ba hemu, la mete ba halo problema maibé agora feto mete lanu tanba demokrasia, tanba ne’e nu’udar estudante husu atu maluk feto sira tenke aproveita demokrasia ne’e hodi estuda, eskola nune’e labele hetan diskriminasaun ba moris iha nasaun nia laran tenke kompete atu hadia moris familia nian parabens dala-ida tan ba feto timor hotu.”

Sitasaun ka kutipan ne’e mai husi fonte feto ida ho naran Rosa Pereira. Iha parte ida nia mensajen pozitivu tanba fó parabens ba maluk feto sira no husu feto maluk sira uza oportunidade di’ak hodi aprende, nune’e bele kompete. Maibé iha parte seluk ninia liafuan sira iha fraze sitasaun nian mesak *bias gender* tanba dehan uluk iha situaun difisil feto nia dignidade aas agora iha âmbito demokrasia feto nia dignidade tuun tanba mete hemu tua no lanu. Sitasaun ne’e la’ós deit *bias gender*, maibé mós nafatin enfatiza iha mitu ka mitos hanesan temi ona iha leten tanba buat ida hemu no lanu ne’e akontese ba ema hotu-hotu, tantu mane no feto iha sosiedade Timor nian husi kedas tempu beila sira nian, la’os foin iha area ukun-an ne’e.

Ho faktu no análise iha leten, ekipa CI konsidera Redasaun Guardamor. viola Kódigu Étika 7 tanba halo reportajen ne’ebé ninia konteúdu diskriminativu. Aleinde ida-ne’e, notícia ne’e mós la-tuir prinsípiu sira ne’ebé hakerek iha Matadalan Reportejen VBJ ne’ebé fahe ona ba kanál mídia hotu-hotu.

***STL, 13 Feveiru 2024**

***Típu Notisia: Straight News**

Notisia STL , Edisaun 13 Feveiru 2024, ho títulu ME Hakarak Ingresu Espesial, KFP Lakohi, Polisia Kaptura Manifestante 10”. Tuir CI nia análise, notisia ne’e nia títulu sensasionál no la-reflete faktu deklarativa iha notisia nia lead no sitasaun ka kutipan fonte nian iha notisia ne’e. Iha notisia ne’e lead mosu liafuan la-aseita, enkuantu iha notisia nia títulu jornalista uza liafuan lakohi. Entaun, liafuan lakohi iha títulu notisia no liafuan la-aseita iha notisia nia lead lahan-malu, nune’e halakon tiha sentidu no signifikadu loloos notisia ne’e nian. Notisia nia lead mak, “Ministeriu Edukasaun (ME) no profesor kontratadu interpreta Artigu 11 lei 31/2023 ne’e la hanesan, maka Ministeriu Edukasaun decide atu halo ingresu espesial ba profesor sira, maibe Komisaun Funksaun Públika (KFP) la aseita, tanba se halo ingresu espesial maka ministériu viola lei 31/2023, liuliu Artigu 11 ne’e. Leksikalmente, liafuan lakohi no la-aseita ninia signifikadu ka arti la-hanesan ou diferente.

Nune’e iha ninia karta protestu, Ministériu Edukasaun lamenta ho títulu notisia nian, la’ós konteúdu tomak husi notisia refere. Maske nune’e, tuir CI notisia ne’e mós la-justu no balánsu tanba Redasaun STL la-halo konfirmasaun ho parte Komisaun Funksaun Públika (KFP) no profesor kontratadu sira atu buka-hatene veracidade (kebenaran) kona-ba narativa ida-ne’ebé dehan “KFP la-aseita planu ingresu espesial” husi Ministériu Edukasaun. Nune’e parafrase ka narativa iha notisia nian lead nu’udar interpretasaun jornalista nian bazeia situasaun profesor kontratadu sira ne’ebé dadauk ne’e sai ona polémika iha railaran. Notisia nia títulu mós la-tuir faktu loloos ne’ebé akontese no ida-ne’e konsidera nu’udar interpretasaun sujetivu ka opiniaun jornalista ka editór nian.

CI haree katak iha fonte ida deit mak sita iha notisia ne’e. Fonte ne’e mak Portavoz Ministériu Edukasaun, Filipe R. Pereira. Fonte nia sitasaun mak, “Ha’u hakarak konta uitoan atu hatete ba ita boot sira katak, depois iha nonu governu mai Ministra ho Sekretariu Estadu koko oinsa lori profesor kontratadu sira iha ministeriu ne’e atu ba ingresu espesial, bazeia ba dekretu lei no 31/2023 ne’e ezzjénsia legal, ne’ebe ministeriu koko atu halo, iha setembru ho outubru ME kordena ho KFP haree planu oinsa lori profesor kontratadu atu ba ingresu espesial, tuir artigu 11 no 31/2023.”

Ho ida- ne’e, CI konsidera Notisia ne’e viola Kódigu Étika Pontu 2 tanba jornalista la hato’o faktu ho loloos no la distingui entre faktu no notisia. Notisia ne’e mós viola Kódigu Étika Pontu 6 tanba Redasaun STL la-halo konfirmasaun ho parte sira ne’ebé sai sujetu ba notisia ne’e hodi halo notisia ne’e balánsu.

***STL, 27 Juñu 2024**

***Típu Notisia: Straight News**

Noíisia STL , Edisaun 27 Juñu 2024, ho títulu “Publiku Kestiona Rui Pereira Envolva Partidu Balun”. Tuir CI nia análise, notisia ne’e nia konteúdu (news body), liuliu sitasaun ka kutipan nian la-reflete ka lahan-malu ho títulu no lead notisia-nian. Títulu no lead notisia-nian kona-ba públiku kestiona Sr. Rui Pereira ninia independénsia bainhira lidera CAC tanba envolve an iha partidu polítiku. Maibé, sitasaun notisia-nian

apresenta fali faktu seluk ho natureza akuzativu. Lead notisia nian mak, “Publiku kestiona Rui Pereira ba iha Komisariu Komisaun Anti Korupsaun (KAK), tanba antes nee envolve iha partidu politiku balun”. Nune’e, halo notisia ne’e nia kontéudu, liuliu sitasaun sees husi notisia-nia título no narativa ka fraze iha notisia-nia lead. Notisia-nia link: <https://stltimorleste.com/politika/publiku-kestiona-rui-pereira-envolve-partidu-balun/> .

Notisia ne’e nia sitasaun akuzativu mak, “Antes involve aan, nia agora nafatin involve aan iha partidu, dala ruma ita la envolve aan kedas, maibe Prokurador Jeral Jose Ximenes uluk nee simu ordem husi partidu, tanba nee mak nia ba enkontru ho Prokurador sira iha Brazil ho asesor Cabo Verde ida sira sai lao ho nia feen atu sosa brinkus ba nia feen la lori osan asesor mak fo hela osan ba, fila fali mai,” dehan PM Xanana ba jornalista iha Palasiu Prezidente. Karik ita mak halo ida nee waoo kestiona, maibe Prokuradór Jeral rasik lae, no prokuradór nee mak lori provedór sira seluk ba haree ba ida nee no ida neeba, sira dehan ami la haree ba kazu ida, Hmhmh pelumenus tenke foti sae ba Timor laran tomak katak nia iha problema, hodi nia hasai tiha prokuradór imi sei lembra, maibe imi sei kiik hotu, SD hotu, depois halo kontestasaun ida depois mak hatama fali sira, buat sira nee hotu.”

Aliende ho natureza akuzativu (trial by the press), notisia mós la-balánsu tuir prinsipiu jurnalizmu *cover both sides* tanba Redasaun STL la-halo konfirmasaun ho Sr. José Ximenes nu’udar akuzadu iha notisia ne’e. Redasaun STL iha obrigasaun étika atu halo konfirmasaun ho parte ne’ebé hetan akuzasaun iha notisia ne’e hodi evita konkluzaan sujetivu husi públiku, maibé ida-ne’e la-akontese. Entaun, husik notisia ne’e sai akuzativu hodi la-tane prinsipiu prezunsaun inosénsia nu’udar haktuir iha Kódigu Étika Pontu 5.

Ho ida- ne’e, CI konsidera Notisia ne’e viola Kódigu Étika Pontu 5 no Pontu 6 tanba publika notisia ne’ebé halo akuzasaun hasoru ema seluk sein halo konfirmasaun.

***STL, 26 Juñu 2024**

***Típu Notisia: Straight News**

Notisia STL , Edisaun 26 Juñu 2024, ho título “**Fidelis Magalhães Ho Mericio Akara Halai Sai Husi PLP**”. Tuir CI nia análize, notisia ne’ebe kompleta iha link ne’e- [Fidelis Magalhães Ho Mericio Akara Halai Sai Husi PLP - STLNEWS \(stltimorleste.com\)](https://stltimorleste.com/news/fidelis-magalhaes-ho-mericio-akara-halai-sai-husi-plp), ne’e la-apresenta faktu no verasidade lolos kona-ba rejignasaun Sr. Fidelis Magalhaes no Sr. Mericio Akara husi Partidu Libertasaun Popular (PLP) nu’udar haktuir iha título no lead notisia nian. Se notisia ne’e dehan membru PLP na’in rua ne’e sees ona husi partidu, pelumenus notisia ne’e hatudu faktu hanesan karta rejignasaun ho karta-ninia número, la’ós apresenta deit faktu deklarativa husi fonte ne’ebé la-klaru. Maske, jornalista STL konsege halo konfirmasaun ho Deputada Maria Angelina Sarmiento nu’udar Xefe Bankada PLP iha Parlamentu, maibé nia la’ós fonte prinsipál. Fonte Deputadu Maria Angelina Sarmiento nia sitasaun ka kutipan iha notisia ne’e mak, ““Ida nee hau direktamente seidak rona informasaun husi sira nain rua, maibe ha’u mós akompaña informasaun ne’ebé iha katak, sira sees an ona husi PLP.”

CI haree katak sitasaun fonte nian ne'e nu'udar faktu deklarativa deit, la'ós faktu lolos tanba nia rasik seidauk haree karta rejignasaun ne'e no rona tutan deit husi elementu sira PLP nian. Tuir loloos, Redasaun STL halo konfirmasaun direta ho sira ne'ebé simu karta rejignasaun iha sekertariadu partidu nian no halo konfirmasaun direta mós ho Sr. Fidelis no Akara atu hatene ninia veracidade lolos. Entaun, notísia ne'e hato'o deit veracidade parsiál ka kebenaran sepihak no seidauk to'o veracidade jurnalizmu lolos. Aleinde ida-ne'e, notísia ne'e ho formatu straight news, entaun la-kle'an no la-konsege apresenta elementu notísia "Why" razaun tanba saida mak sira na'in rua sees husi PLP.

Lead notísia nian mós la-bazeia ba faktu tanba laiha atribuisaun fonte lolos, informasaun iha narativa lead nian ne'e mai husi se. Notísia nia lead mak, "Fidelis Leite Magalhães no Mericio Juvinal dos Reis "AKARA" iha loron hirak liu ba apresenta ona karta rezignasaun ba Presidente Partidu Libertasaun Popular (PLP), Taur Matan Ruak, hodi sai husi partidu refere. CI mós haree katak lead notísia-nian ne'e la mai husi fonte ruma, maibé bazeia deit ba informasaun ne'ebé STL foti husi fonte ne'ebé la-klaru tanba laiha atribusaun fonte.

Ho ida-ne'e, CI konsidera Redasaun STL viola Kódigu Étika Pontu 1 tanba la-hato'o informasaun lolos kona-ba Sr. Fidelis no Sr. Akara nia rejignasaun husi PLP. Notísia ne'e mós viola Kódigu Étika Pontu 6 tanba la-halo verfikasaun ba informasaun ne'ebé iha no laiha konfirmasaun ho parte sira ne'ebé saii sujetu ba notísia ne'e.

***Dili Post, Marsu 2024**

***Típu Notisia: Vox POP**

Dili Post, Edisaun 15 Marsu 2024, ho título "Tein Sasoro Feen Hasan Bubú". Tuir CI nia análise, notísia ne'e notísia ne'e título sensasionál no la sensível ba asuntu violénsia bazeia ba jéneru (VBJ) tanba halo jusitikasaun ba aktu violénsia demestika ne'e nu'udar divertimentu ka hiburan ida no la konsidera aktu ne'e hanesan violasaun di reitu úmanu. CI mós haree katak fraze ka narativa iha notísia ne'e nia título konsidera nu'udar konkluzau jornalista nian bazeia ba rezultadu prosesu julgamentu iha tribunál. Konkluzasaun ne'e hanesan justifikasaun ida katak tein sasoru mak nu'udar kauza violénsia doméstika hasoru lezada ka vitima.

Lead no ending notísia nian di'ak no hakerek tuir matadalan reportajen ba VBJ no la kontra Kódigu Étika Jornalística. Notísia nia lead mak, "Ministeriu públiku (MP) iha ninia alegasaun husu ba tribunál aplika pena prizaun (PP), kondena fulan neen (6) ba arguidu ho naran inisiál OSG tanba halo agresaun hasoru nia feen lezada ho inisiál JAX. Iha fraze lead notísia nian Redasaun Dili Post uza inisiál naran inisiál hodi evita julgamentu (trial by the press) hasoru lezada ka vitima iha notísia ne'e.

Maske nune'e, iha narativa (paraphrase) da-11, Redasaun Dili Post tau momos lezada ninia naran kompletu. Narativa da-11 notísia nian mak, "Hahalok arguidu nian, halo Lezada sente moras iha oin, moras iha hasan parte loos, no kanek ha lezada niaibun kulit. Konsekuénsia husi arguidu OSG nian konduta hirak ne'e, kauza Lezada Juvelina Antonio Ximenes hetan moras iha oin iha hasan parte loos no kanek ihaibun kulit.

Ho faktu no análise iha leten, ekipa CI konsidera Redasaun Dili Post viola Kódigu Étika 5 tanba halo reportajen ne'ebé ninia konteúdu halo identifikaun ba vitima violénsia doméstika. Kódigu Étika Jornalística, Pontu 5 haktuir *Salvuarda prezunsaun inosénsia*

arguidu iha prosesu tribunal nia laran to'o hetan desizaun final hosi tribunal no respeita vitima krimi no nia familia sira nia identidade, ho kuidadu especial atu husik nudar anonimato ba vitima krimi seksual no labarik sira nebe sai arguidu. Aleinde ida-ne'e, notisia ne'e mós la-tuir prinsípiu sira ne'ebé hakerek iha Matadalan Reportejen VBJ ne'ebé fahe ona ba kanál mídia hotu-hotu.

***SapNews Online, 13 Janeiro 2023**

***Típu Notisia: Straight News**

Notisia SapNews Onlie, Edisaun 13 Janeiro 2023, ho título "Papa Francisco Permite Padre Sira, Fó Bensa Ba Kaben Nain ho Sexu Hanesan". Ci haree katak notisia ne'e nu'udar rezultadu tradusaun husi testu (text) notisia ne'ebé mídia online railiur nian ho naran Christianity Report.com. Tanba tradus direta. Nune'e la-tuir ninia kontestu loloos, entaun halo sentidu no signifikadu loloos husi testu notisia ne'e rasik lakon. Pur ezemplu, hanesan fraze padre sira. Fraze ida-ne'e la-mosu iha título orijinál notisia nian iha versaun Inglés. Título iha testu Inglés mak, "The Pope Permits the Blessings for Same-Sex Couples,". Bainhira haree didi'ak no halo komparasaun título rua ne'e, klaramente iha versaun Tetun uza eventál pesoál ka kata ganti orang hanesan padre sira, enkuantu título iha testu Inglés la-uza fraze eventál pesoál. Entaun, bainhira ita interpreta atu hanesan fali (seolah-olah) padre sira bele fó bensaun iha kontestu rituál nian katak padre sira bele fó kaben ba kazal sira ho seksu hanesan. Notisia nia link: <https://christianityreport.com/2023/12/17/the-pope-permits-the-blessings-for-same-sex-couples/>.

Aleinde ida-ne'e, testu notisia versaun Tetun uza liafuan kaben-na'in, la-uza liafuan kazál iha inglés dehan couple. Ezemplu hanesan fraze Papa Francisco Permite Padre Sira, Fó Bensa Ba Kaben Nain ho Sexu Hanesan. Enkuantu fraze iha testu Inglés mak, "The Pope Permits the Blessings for Same-Sex Couples. Testu tradusaun bai ha lingua Tetun halokon tiha signifikadu no sentidu loloos husi notisia ida-ne'e. Etikamente, Redasaun SapNews laiha konfirmasaun ho parte Igreja atu fó komentáriu hodi esplika didi'ak intensaun loloos husi Amu Papa ninia desizaun kona-ba bensaun ba kazál sira ho seksu hanesan. Maske iha notisia ne'e nia ending (background) temi hanesan, "enkuantu, deklarasaun ne'ebe aprova husi Amu Papa Francisco ne'e fo permisaun ba padre sira hodi fo bensaun ba ema ne'ebe kaben ho sexu hanesan maibe kaben entre fetu ho mane la muda tuir doutrina igreja katólíka nian."

Teknikamente, husi aspetu jurnalizmu, Redasaun SapNews la-halo atribuisaun fonte ho loloos. Pur ezemplu laiha sitasaun fonte ruma nian, maibé tau deit testu notisia ne'e hanesan informasaun baibain no tau deit mak notisia ne'e nia link atu públiku bele asesu. Buat ne'ebé loos tuir téknika hakerek notisia nian mak ezemplu, tuir Christianity Report.com, pois ho fraze husi fonte." Notisia ne'e mós la-tuir ona valór notisia (nilai berita) "atualidade" tanba notisia versaun Inglés ne'e publika iha 12 Dezembru 2023.

Ho ida- ne'e, Ci konsidera notisia ne'e viola Kódigu Étika Pontu 1 tanba la-hato'o faktu no lia-loos. Aleinde ida-ne'e, notisia ne'e mós viola Kódigu Étika Pontu 6 tanba Redasaun SapNews la-halo konfrimasaun ho parte sira relevante hanesan Igreja.

***Aimoruk Stock Laiha, SSM Dili Husu Idaidak Kuidadu an, Labele Moras
*Independente, 22 Maiu, 2024**

Jornál Independente-nia notísia, edisaun 22 Maiu 2024 ho título “Aimoruk Stock Laiha, SSM Dili husu idaidak kuidadu An, labele moras” ne’e bazeia ba faktu deklrativa ne’ebé fonte sira jerente sentru saúde sira iha Dili hato’o. Iha fonte rua mak Jornál Independente sita (kutip). Fonte rua ne’e mak Diretór Servisu Saude Munisipiu Dili, Mateus Pinto no Diretór Klínika Bairro-Pite, Kewen Robert Lu Pereira. Sitasaun ka kutipan fonte Primeiru, Mateus Pinto, “agora dadaun aimoruk iha Servisu Saude Munisipiu Dili hamutuk 60 item ho 22.90 % mak stock laiha, tanba ne’e ita husu ba públuku atu kuidadu an iha situasaun ida-ne’e atu nune’e bele prevene husi moras oioin”. Enkuantu, situasaun husi fonte Segundu, Kewen Robert Lu mak, “Agora ami iha 39 item mak stock out ne’e maioria aimoruk ne’ebé ita uza beibeik ka aimoruk esensial mak hanesan, amoxicilin, amoxiclav, no xarope ba labarik sira-nian no ba paciente sira-ne’ebé tensaun, raan midar.

Ho faktu deklrativa sira husi fonte rua ne’e, CI haree katak notísia-nia título refleto duni faktu deklarativa sira ne’ebé fonte rua ne’e hato’o no tuir sirkumtánsia ne’ebé iha. Aliende notísia-nia título, notísia-nia *lead* mós refleto faktu deklrativa fonte sira-nian iha sitasaun laran no dados sira ne’ebé notísia ne’e apresenta. Notísia nia *lead* mak, “Servisu Saúde Munisipiu Dili husu ba sidadaun sira atu kuidadu an hodi bele prevene an husi moras, tanba problema menus aimoruk ne’ebé kontinua akontese iha ospital no facilidade saúde sira.”

Iha notísia ida- ne’e, Jornál Independente, la’ós deit halo sitasaun ba fonte sira, maibé mós apresenta dados liga ho saida mak hanaran aimoruk *stockout*. Dados ne’ebé Jornál Independente publika mak, “agora dadaun aimoruk iha Servisu Saude Munisipiu Dili hamutuk 60 item ho 22.90 % mak stock laiha. Nune’e mós sentru saúde iha Manufahi, aimoruk item 11 mak stockout, hanesan amoxilin tab, paracetamol tab, diclo tab, ibuprofen tab, erythromicy tab, vitamina B1, vitamina c tab, closo syrup, bromhexine syrup, hydrocortisone injeksi no kanula. Finalmente, CI konlkui katak Jornál Independente nia notísia ne’e hakunu rekizitu produktu jornaliitiku nian no elementu notísia tolu ne’ebé iha mak hanesan faktu, rezultadu entrevista no dados. Nune’e, Jornál Independente nia notísia ne’e konsidera nu’udar verasidade jurnalizmu (kebenaran jurnalizmu) iha kontestu kobertura no parte ida husi papél kontrolu sosial média nian hodi garante transparénsia no boa governasaun iha país demokrátiku Timor-Leste.

***Fulan 8 Ona, Sali-Magu Foin Hatama Aimoruk Item 63
*Independente, 31 Maiu 2024**

Jornál Independente-nia notísia, edisaun 31 Maiu 2024 ho título “**Fulan 8 Ona, Sali-Magu Foin Hatama Aimoruk Item 63.**” Tuir Conselho de Imprensa (CI) nia análise, título notísia ne’e refleto faktu no sirkumtánsia ne’ebé iha. Liuliu faktu no dados ne’ebé Jornál Independente apresenta iha *background* notísia nian. Narativa *background* notísia nian mak, “Entertante, iha fulan Outubru 2023 Ministra Saúde Elia dos Reis

Amaral halo ajudikasaun direta ba Komapaña Sali-Magu Unipesoál Lda. Hosi sosa produktu médiku iha períodu fulan tolu nia laran ho total orsamentu token \$ 5,999,990.07. CI haree katak fraze título notisia nian bazeia ba faktu no *background* notisia nian ne'ebé jornalista ka editór sura kedas husi fulan Outubru 2023 bainhira Kompañã Sali-Magu hetan ajudikasaun direta husi Ministériu Saúde. Nune'e, faktu ne'ebé Jornál Independente apresenta kotradis ho faktu ne'ebé Kompañã Sali-Magu hato'o iha ninia keisar ne'ebé dehan, "ami foin serbisu fulan 6, la'ós fulan 8." Kompañã Sali-Magu sura total fulan bazeia ba kontratu ne'ebé sira asina.

Iha fonte tolu mak Jornál Independente sita sira nia deklarasaun liga asuntu aimoruk ne'ebé kanal mídia ne'e foti nu'udar haktuir iha título notisia nian. Fonte sira ne'e mak Presidente Receive and Inspection (R&I) Ministeriu Saúde (MS) Alipio da Costa, Diretór Ezecutivu INFPM Brigido Simão Dias de Deus no Diretór kompañã Sali-Magu Sansão Gomes. Laiha fonte ida mak ko'alia kona-ba título ne'ebé dehan fulan 8 ona, Sali-Magu foin hatama aimoruk item 63. CI haree katak título ne'e nu'udar interpretasaun ka análise husi jornalista ka editór nian bazeia ba desizaun ajudikasaun direta ba kompañã Sali-Magu iha Outubru 2023 ne'ebé antes ne'e sai notisia ona iha mídia nasional sira.

Nune'e, sitasaun ka kutipan husi Diretór-Ezekutivu INFPM, Brigido Simão Diaz de Deus bazeia ba kontratu ne'ebé Komapaña Sali-Magu iha. Fonte nia sitasaun mak, "Sasan sira-ne'ebé agora ami simu total 300 ital item, ne'e sura kedas dezde Dezembru (2023) mai ne'e, husi total ida-ne'ebé nia prontu ona atu hatama mai to'o fulan Jullu ne'e atu kompleta 531 item". Bainhira sura número fulan hatama aimoruk nian husi Dezembru 2023 – Maiu 2024, entaun ninia total mak fulan 6, nu'udar número total fulan servisu nian ne'ebé kompañã Sali-Magu hato'o iha ninia keisar. Matematikamentu – penjumlahan sura husi Dezembru 2023 – Jullu 2024 mak foin to'o fulan 8. Nune'e mós bainhira sura husi Outubru 2023 – Maiu 2024, ninia total mak 8.

Enkuantu, sitasaun husi Diretór kompañã Sali-Magu Sansão Gomes mak, "*Sasan ami hola hotu ona desde fulan Marsu ne'e. Agora ne'e mai par hatama de'it.*" Kona-ba (kontratu) alin jornalista sira bele ba INFP mak hatene. Importante ba ami kumpri deit kontratu tanba sasan ami hola hotu ona." Maske, iha sitasaun ne'e diretór kompañã Sali-Magu la-hato'o total fulan servisu nian, maibé faktu deklrativa sira husi parte INFPM nu'udar mós faktu hanesan haktuir iha Sali-Magu nia Keisar. Entaun, faktu ne'ebé Jornál Independente hato'o ne'e konsidera nu'udar faktu jurnalizmu, la'ós fake news tanba apresenta dados sira ne'ebé antes ne'e publika ona. Maske diferente ho faktu ne'ebé INFPM no Komapaña Sali-Magu apresenta.

***Independente, 26 Janeiru, 7 no 9 Feveiru 2024**

***Dala ida tan, laiha Sali-Magu iha lista Alfandega, Gabinete PM hahú buka tuir**

***Aimoruk kontentór haat OTW, Deskonfia INFPM mak Sosa laos Sali-Magu**

***Aimoruk kontentór tolu INFPM mak sosa, hatama no seluk taxa, Sali-Magu hein simu no fornese.**

Faktu sira ne'ebé Jornál Independente nia notísia edisaun 26 Janeiru ho título “aimoruk kontentór haat OTW, Deskonfia IFPM mak sosa laos Sali-Magu” nu'udar parte ida husi konfirmasaun no verifikasaun atu hetan verasidade (kebenaran) kona-ba deklarasaun husi ekipa Integradu Ministériu Saúde ne'ebé hateten katak iha 25 to'o 27 Janeiru ne'e kontentór haat ne'ebé komapaña Sali-Magu Unipesoal Lda sosa husi Indonézia sei to'o iha Timor-Leste. Konfirmasaun no verifikasaun ne'e halo ho fonte relevante sira no dadus sira husi entidade sira relevante liga ho prosesu sosa aimoruk ne'ebé sai ona polémiku iha públiku. Faktu konfirmasaun no verifikasaun husi Jornál Independente hatudu katak aimoruk kontentór haat ne'e la'ós sosa husi kompañia Sali-Magu, maibé regularmentu sosa husi INFPM ne'ebé antes ne'e ho naran SAMES.

Iha kontestu ne'e Jornál Independente uza fonte anonimu ne'ebé serbisu mós iha INFPM karik tanba kestaun seguransa, nune'e Independente la-publika nia identidade loloos. Faktu deklarativa fonte nia mak “desde uluk, SAMES halo *agreement* ho fabrika iha Indonézia, PT. MJB PHARMA, sira mak fornese (produitu farmasia no medikamentu) bainhira SAMES order.” Iha kazu ne'e, liuliu iha notísia ne'e, Jornál Independente mós apresenta dadus kona-ba prosesu sosa aimoruk ne'e no entidade ne'ebé sosa aimoruk. Dadus ne'e mak “entertantu tuir packing list ne'ebé Jornál Independente asesu ho número: 0013-0124, ho número pedidu kompra: RDTL – INFPM SS-023-081. Dadus ne'e hatudu katak IFPM mak sosa aimoruk no medikamentu ne'e. Jornál Independente nia notísia edisaun 7 Feveiru 2024 ho título Dala ida tan, laiha Sali-Magu iha lista Alfandega, Gabinete PM hahú buka tuir nu'udar parte ida husi métodu reportajen investigativu “tracing” atu hetan verasidade ka lia-loos husi kazu prosesu sosa aimoruk no medikamentu husi Sali-Magu. Liuliu liga ho asunto sira ne'ebé sai tópiku diskusaun públiku nian, buat ne'ebé intensionalmente hasubar husi públiku, kestaun abuzu podér no seluk-tan.

Aliende ida-ne'e, Jornál Independente nia notísia edisaun 9 Feveiru ho título “Aimoruk kontentór tolu INFPM mak sosa, hatama no seluk taxa, Sali-Magu hein simu no fornese. Notísia ne'e mós apresenta faktu sira husi entidade sira relevante hanesan Alfandega kona-ba prosesu sosa aimoruk husi Kompañia Salimagu. Notísia ne'e apresenta konfirmasaun no verifikasaun faktu deklarativa sira husi ekipa Integradu Ministériu Saúde nian ne'ebé hateten katak Sali-Magu mak sosa aimoruk no medikamentu. Notísia ne'e apresenta faktu no rezultadu entrevista parte Alfandega nian atu hetan verasidade kona-ba deklarasaun ne'ebé Ekipa Integradu Ministériu hato'o

katak Sali-Magu mak hatama aimoruk no medikamentu. Fakta deklarativa husi fonte Armindo dos Santos nu'udar direktór nasionál operasaun Alfandega, “depois de ami shortlist filafali ba dokumentus ne'ebé iha, liga ho kontentór tolu ne'e, SAMES (INFPM) mak halo importansaun, laos husi Sali-Magu. Dokumentu ne'e rejistu ona iha sistema, halo tiha ona pagamentu ne'e mak horseik kontentór sai tiha ona ne'e. Fonte ne'e mós hateten “iha sistema asycuda Alfandega la koñese Sali-Magu, signfika prosesu hotuhotu ne'e halo husi INFPM.” Fonte nia situasaun mak, “ha'u dehan iha sistema ne'e ami la hatene Sali-Magu, signfika iha prosesu ba dokumentus hotu-hotu ne'e sira ne'ebé halo servisu ne'e nian mak selu. SAMES mak selu, laos Sali-Magu tanba laiha Sali-Magu nia dokumentu ida iha ami.”

Enkuantu, notísa Jornál Independente edisaun 7 Feveiru ho título “Dala ida tan, laiha Sali-Magu iha lista Alfandega, Gabinete PM hahú buka tuir. Notísa ida-ne'e mós ho intensaun atu halo konfirmasaun no halo verifikasaun mós ba faktu deklarativa ne'ebé parte INFPM hato'o katak Kompañia Sali-Magu hatama ona kontentór tolu no dadauk ne'e ekipa sei halo prosesu clearance molok hasai husi Portu Tibar hodi rai iha armajen INFPM. Fonte husi INFPM, Mariano da Silva nu'udar direktór aprovizionamentu hateten katak Sali-Magu hatama ona aimoruk kontentór tolu no sei iha Portu Tibar. Enkuantu, konfirmasaun ne'ebé Jornál Independente halo ho Direktór Nasionál Operasaun Alfandega, Armindo dos Santos hatudu katak laiha dadus ida kona-ba Sali-Magu iha sistema Alfandega nian. Fonte nia sitasaun mak, “ha'u atu informa deit ba media katak depois de horseuk (5 Feveiru) simu pedidu husi Gabinete Primeiru Ministru, komisariu haruka tiha ona ba sistema, too data ida ohin (horseik), 6 Feveiru ne'e, laiha kompañia ida atas nama Sali-Magu mak hatama aimoruk mai Portu Tibar.”

D. Rekomendasaun

Bazeia ba rezultadu monitorizasaun no análize ida-ne'e, CI hakarak rekomena ba:

- a. Kanál mídia no jornalista hotu-hotu atu nafatin kumpri Kódigu Étika Jornalística no prinsípiu jurnalizmu bainhira halo kobertura no publikasaun notísa, liuliu evita halo publikasaun notísa ne'ebé ninia konteúdu akuzativu.
- b. Editór no xefe redasaun hotu-hotu iha kanál mídia sira atu haree didi'ak aspetu étika no prinsípiu jurnalizmu sira bainhira halo editing ba notísa ruma no deside hodi publika notísa.
- c. Jornalista no editór hotu-hotu atu sensivel ba asuntu violénsia bazeia ba jéneru (VJB) bainhira halo kobertura no hakerek notísa kona-ba asuntu refere.
- d. Jornalista, editór no xefe redasaun sira atu le'e Matadalan Jurnalizmu Inkluzivu no Matadalan Reportajen Violénsia Bazeia ba Jéneru molok hakerek notísa no halo programa kona-asuntu inkluzivu hanesan ema ho difisiénsia, feto, labarik, LGBTQIA+ no seluk-tan.

#hotu#